

景
文
集
八





景 文 集
(八)

宋 祁 撰

景文集卷四十六

記

壽州風俗記

〔案〕郡知壽州在慶歷元年記作于次年

壽州古揚州之偏。本治壽春。于天文直星紀。春秋世名蓼六者。後爲楚所并。及戰國。楚卒徙都。更曰郢。秦號九江郡。項氏始爲國。王其愛將英布。漢名淮南。以封子厲王。國除。復爲郡。三國時。南切吳。魏以爲邊。號淮南郡。江左北拒胡。晉以爲邊。號南豫州。逮齊梁。嘗宿戍防。魏周爲揚州。隋唐爲今名。或爲壽春郡。唐季。僞吳盜據茲地。私號清淮軍。後唐僑置忠正軍節度。周世宗克淮南。遷治潁之下蔡。因以下蔡節度領。自正陽撤浮析屬之。州南夾隄樹譙。遂爲勝鎮。眞宗泊上之在藩也。又敗封焉。美名華區。故爲淮南第一縣。曰下蔡。曰壽春。曰霍丘。曰安豐。曰六安。地橫狹而縱脩。東抵濠百里。旁值廬百里而贏。南距舒五百里。斜觸光三百五十里而近。西壓潁五十里。北抵亳百有二十里。近者在舍。隅負宿三十里而易。籍戶。主守九萬有畸。生齒倍之。賦租以斛計者歲二十萬。以緡者四之一。絢兩計者三十萬。匹端者八之一。沿賦辦訂。上千百計。故輸入都內壽爲多。土塗泥。田下下。筴之禹書。二男五女。畜宜鳥獸。職之周官。家巫史。重淫祀。性躁氣果。紀之史志。諗于方俗。逮今猶然。厥貢三種。惟櫟、米、魚。魚爲大官盛味。茗場凡三。曰開順、麻步、

山歲權無慮三萬鈞。坐居行齋。率千金以算。其利不貲。民又時時盜賣。吏緩之則輕犯法。急之則窮爲此。埋株送噍。類不容獄。故掌理者分院左右。乃勝其煩。鎮山曰八公。大別。霍霍爲嶽帝。下祠八公。往往得並。詫曰劉安所遺。由霍而外。獻嶧岑羅。迤麓崇岡。奔沓相聯。猶肱臂然。材章竹箇。刊伐菑翳。連千村而下。衍給旁郡。食夥產茂。四方游惰多隱處焉。搏掩痕鬪。輕死亡命。故候邏者常以逮捕爲負。其川曰淝。潁。淝。豐。率淝而往。潁。淝。潁。淝。集。潁。淝。浸灌相交。如膺脈然。卒皆入于淮。淮行六百二十里而東。淵隈頓產蠙珠。民亦取之。雖得不償所費。其大陂曰芍。古嘗溉百萬畝。淝水注焉。漢置陂官。歲廩月淤。吏不能治。今裁溉五十萬畝。寶隄爲三十六門。均出興入。各有後先。自芍而下。峙庸鍾潦。灑而洩之。不能以名達者。又數十處。當旱而霖。訖無凶年。稻粳甘精。南方之冠。下則芡芰蒲菱。擱留魚鼈。亦無飢人。越紵縑絲。金鐵匏革。會南北之交市。率征之。其泉四千萬。酒數千釀。分肆開墮。幹八千萬。漕鹽六萬石。直十千萬。故其俗侈快。剽輕。皆情相夸。農與賈參。迭爲并兼。少師儒。不甚官學。亦利使然也。務叢法弛。守亟遷。吏頗怵爲奸欺。自天聖初元。訖茲二十歲。凡易守者二十一。旁緣舊新。玩敵科禁。斷簿辟名。賂謝交臂。藉故潰紛。恬不爲嫌。非長人皆不能。吏獨資惡政使然也。嗚呼。害吾治者。果在官數易歟。龍集辛巳。予以病自乞。實來此邦。越明年。病稍愈。因得推畧舊聞。納驗今事。而著之篇。以示後人。噫。予誠慙愚。上若不忍加誅。使治壽也。及三年。可使知教。與夫傳遽閱人。則爲之猶賢乎已。慶歷二年夏五月。哀次。

秀州重修鼓角樓記

景祐元年夏四月，嘉興郡新作臺門。書時，且言功也。越翌日，掾屬邦人從二千石南陽葉君道卿陟降而達觀之。醴酒大會，以修釐禮成。率籲牆進，願以更張經始。及悅以使成，勿亟之。能咨春秋之徒，善敘其狀。發聞馨香，與石皆泐。君抑不止，乃繪圖以諗予。且俾列其崖畧。秀故蘇屬邑也。錢氏王二泐，欲侈地以自張。始建爲州，國朝因焉。然而饒漕走集，貨貲遷引，事叢政厯，地劇官勤。一都會之不若也。先是，寺署本于霸朝。因時之汙，以陋自恃。嚴扉弗閱，液材將壓。後之長人者，姑重改作，苟完僅底而已。歲直癸酉，今上躬攬威柄，用甘露黃龍故事，高選牧守。嘉靖方國，于是太守九江龐君醴之，以治有異等，入視行馬內事，而以君代之。君因其化條，遂用不變。居者弗擾，流者自占。已日乃孚，卒歲大穰，如銷金揉木，無時月之累。以仁繼賢故也。初，龐君旣以郡儀不稱，而懷必葺之慮，且憚傷財而勤民也。因上言郡有樵廬，斥賈千緡，願權奇贏，將助興作，實被可報，未克僱工。君之至，則檢結故符，以成龐志。揆日力，計徒庸，易彼將壞，成我大壯。乃廣麗譙，以冠牙門。乃挾修宇，以華游觀。飛軒旁注，夷道在下。其內則大敞重扃，夾植綺蘭，層廈纒連，雙廡翼張，廣豁靜深。乃至黃堂，其制大，可以重威，其度高，可以臨下。閒民窮隸，于是乎督之。故夫家不煩，羨材積草，于是乎用之。故虞衡不勞，役興仲冬，跨三時而畢。初樵賈不足以償費，又出庫錢續之。率用三百萬，樓成，及左右宇若干楹，內屏聯屬若干楹，有因有創，如君之素儲。鼓角于樓，以節曉昏，列檠幡于

屏以雄矩儀。管籥常于斯。憲令常于斯。開闔有宜。誰何有禁。入騎不隄。出車不擊。千里奔走。四隣表則。議者謂斯舉也。不專于詩之攷室。禮之修鍵。所以備邦制而虔君命。變則通。通則久焉。噫。以道卿之敏秀而文。洵直而方。由諸生。取峻科。入道山。籍治朝。其所履踐。皆沛如桑林。鏗若黃鍾。含章慮善。以先王國。今又興輪奐于官下。樹藝極于吏師。導物忠厚。洗人愁嘆。陟狀此功。爲東南第一。號君子者。故不器歟。昔漢武帝時。惟董仲舒。公孫宏。倪寬。居官可紀。三人皆儒者。以經術緣飾吏事。後孫與倪皆至三公。則醕之之居于前。道卿之繼于後。今日之政。異時之仕。合儒林循吏而兼得之。爲天子所器。可前知矣。予泊伯氏。與道卿聯仕牒。竝直廬。知之也深。姑因落成之日。遂推雅行之美。且塞秀人之勤請云。謹記。

山東德州重修鼓角樓記

明道元年。清河張君以尙書曹員外。佩二千石印綬。來莅州事。君之下車也。以縣官詔書慰安元元。事無尤違。獄無頗類。吏不諉官。軍不愬農。曩之捐瘠富而教。嚮之愁嘆歌且舞。五月報成。邦人宜之。于是攷前守之遺慮。與公家之長利。細大貫行。各有後先。惟時州門因陋且久。風雨弛其椳棟。塵塼漉其丹堊。衆謀不輯。憚于改爲。君喟曰。吏民之師也。居處位署。所宜有制。況四邦結轍。萬夫屬目。禮容不稱。其謂我何。姑欲因舊謀。新焜照蕃屏。豐不至侈。則統上之尊。儉不至偏。則容下之羞。目以成心。發以知智。乃倅而圖。上下協從。長度員程。無慮役要。材取羨木。力課冗兵。增庠以崇。易朽以堅。桓柱林植。長梁虹亘。限以重屬。列

隔翼以飛。闌曲楯卽之。奐如望之。暈如其板言言。其廈耽耽。層光晝激。虛景夜熠。邪繚睨牆。下敞嚴扉。傳工樂勸。悉如其素。揭州榜于前廡。仍舊常也。列鼓角于中楹。雄聲氣也。州人駭觀。桀僚奔走。乃大和會。從君落成。中飲紀綱。賀且稱曰。在周建侯有都。在漢置守有兵。今之爲州。咸統軍事。故飾軒城。義脩曲沿。臺門之遺象。奏鳴鐘。謹磬鼓。本司馬之成法。況我邦北控戎索。上直天街。財雄地劇。爲千里表率。而巋然譙觀。久不能興。數闔枚過。爲諸侯笑。逮君之至。更張勿亟。人鮮克舉。遂優爲之。旣麗且雄。我君攸濟。君乎永年。其增如陴。君且受福。其積如茨。未幾。天子修復舊章。卽拜君本路詳刑使者。掾屬鬱陶詠嘆。僉謂成功不可以不紀。以僕職在東觀。悉哀沿改之勤。願刻金石。盡信其傳。謹按君爲州之明年。營新樓。役且百人。與正月止四月。樓成。東西八筵有奇。南北三丈而贏。雉堞高顯。率皆稱是。謹始以書時。褒君以不名。用古陽秋之法也。後二年。記成。甫刊勒云。謹記。

壽州重修浮橋記

壽有大桁。昔在正陽。造舟相銜。道北趨南。在周世宗克伐僞吳。桁移下蔡。實濟師徒。壽破之年。州亦北遷。夾淮而城。橋亘其間。於顯是州。民穰貨豐。穀擊蹕奔。日月其僮。長纜蜿蜒。以鑠大臚。臚自溫來。竹以斬輸。官列戍徒。晝護夜呵。一日而闕。則留于行。慶歷之元。予來守藩。庀司急營。橋敝不完。版罅枘脫。陷落是虞。客馬頓鞅。民乘徐驅。予咨于寮。按索舊章。檄發庫錢。布材六安。下令于冬。材集以春。百桴盤盤。泛溜而臻。

是鋸是斤。疏爲千章。密貫繳聯。壓柞扶持。舟牢索堅。坦爲夷塗。虹亘蛇申。川怪畏潛。旅行相歡。無念阻艱。波搖瀨春。脆日焦風。不能爲損。吾新厥功。先時邏兵。纔數十人。老疲瘠惰。不克徼巡。予視臺符。滿百爲率。敕吏如律。事焉肅給。榜成舉觴。徧勞屬官。匪予之力。實惟衆勤。清淮湯湯。斯梁與存。嗣葺不忘。以詒後人。明年後九月。乃刻記于石。

泗州重修水竇牕記

景祐二年。泗上守清河張君。繕防成城。旣彌水患。部刺史交章言狀。治在異等。帝庸嘉之。榮勞增秩。未幾。又以江南漕使之節。畀卽受焉。駢牡焜煌。改轅而東。泗人鬱陶以嘆。僉謂君有大造于我邦。式克還定。鉅功細役。咸有方畧。粲焉可記。雖嚮之建臺門。增治署。集賢南陽葉君道卿。前述其概。聯長隄。捍怒流。尙書外郎武功蘇君儀甫。嗣褒其最。瑋刻相望。驛聲無窮。而水竇牕。惟新底績。忽而不記。則後之人。無以知君精心長利。推行彌密者已。乃咨余求文。以信其傳。州內舊有支渠。受水流惡。股引回注。放于外隄。穴墉爲空。植木如櫺。內水方淹。則導焉以恣其出。外水或暴。則築焉以遏其入。由是無麴窮之困。無重隄之疾。元年。淮汴合漲。齧隄傳。乘四竇之久敝。入墊區舍。君擥菱執扑。親督其役。培薄增庫。僅勝厥災。及水復舊道。君曰。吾知防禦之要矣。明年。遂議改作。撤壞之朽。易瓴之苦。規以墨文。臬其高下。更鑿石千枚。代木作櫺。并固竇門。運甃十六萬。以護溝洫。課員二十六。以總役要。月再朔而功告成。由是視血無阻流。涉遠無停。

潦矣。其夏水復汎溢。幾高民屋。而新隄蟠如。新竇呀如。三老序長。或持一秉耒焉。或操一簣土焉。據堅窒要。守有餘壯。水留十二日而去。民皆按堵有備故也。禮仲春達溝渠。利隄防。以時做人。思召公之風。愛所憩之棠。春秋有所褒者。其文繁而不殺。若張君補弊圖久。克勤小物。合乎禮之時儆。邦人受君之賜。不忘刊美。訂乎詩之愛樹。是美也。由君以勤民得之。異乎人之求之也。予敢不申二君之餘詠。哀傭工之纖悉。用春秋不殺之義乎。噫。繼而共治者。嘉作竇之勞。勿替而引之。可也。明年爲記。乃刊石云。

許州長葛縣尉廳壁記

甚盛德之世。宵人不能不爲盜。盜之發。椎埋搏掩。間不逞。亂齊民。事微敵脆。郡縣可捕。尉之所由置也。郡有縣。縣別一員。煩之以使。驗其能。薄之以廩。嘗其廉。迫之以患。觀其畧。尉之所由選也。當選之之慎。達置之之本。惟才且邵者能之。安定胡君穆侯。其人已陪京之南。許大而雄。三輔事穰。五方俗雜。長葛之邑。連蔓數萬室。宿兵十九營。民狡而貪。法抗且敝。富者易于訟。而貧者輕爲盜。振邏日尋。萃淵不衰。君之來也。狹私而泰于公。急吏而舒于民。獎勤而勉其惰。延而耆老。問以疾苦。于是良農得職。疲民懋力。銖兩之姦。無所容。囊橐之擅。無所私。主名區處。發而輒得。閭境閒閒。易懼以安。里長休于閭。游徼偃于亭。一年而畏。二年而愛。三年而思。其所以感動人心者。從可知矣。先是君之來也。舊邑卜遷。官罔暇給。尉之位署。經始新邦。君祇具簡書。檢以藝極。一簣土。一秉杆。不賦于民。悉仰于官。撤舊屋。圖新構。乃敞斯庭。增而崇。乃安

斯寢熠而容翼其廡以處吏謹其庫以藏甲茲成之日人不知勞春秋之徒善則書不善亦書所以與正而譏失也若君屬役之夥乘政之涼由小官圖遠績承上不諂撫下不攜可謂因其時而善于職矣此而不紀爲能者何且會君之見咨是用列其行書之屋壁旣不能紀遠登此堂者願自胡君始焉

凝碧堂記

會稽謝炳宗作尉之明年創予堂于署南榜曰凝碧託始焉且志地也堂之大畧聞炳宗之言予能紀之陽廡憑高則羣峯橫羅晨霏暝霞從日蔽虧周阿溯遠則畦瀛環瀉雲滫雪瀨與天上下鶻鵠啼呼鱣鯉噉喁萑葭沿緣于涯涘檉楊漫衍于洲步野翠不歸水煙自留此其因天以護勝也春英旣蕃丹紫相妍則薄采乎戶外秋條旣腓槁籟相悲則屬聽乎坐右或冷颼晝泛或陰暉夜流炳宗于是挈勝衿簪良朋壺觴侑前肴核旅右曠望吟嘯軒然謝客中休天倪外忘世纓一樹一草皆可攀藉此因人以護勝也天勝者不營而成人勝者有待而名使二勝交相濟非智且材孰兼得之由堂而觀炳宗之爲則智且材果不得讓已炳宗再上書闕下位不克奮而剛健自強之蘊無所發舒故寓見乎觀游奧阼之間予知異時立功猶今茲之目巧也其面勢纖悉猶有諸公之詩索言之時寶元二年後十二月爲記

重修彭祖燕子二樓記

景祐二年丞相隴西公以大司寇殿徐方瑞節兵璋東雄諸侯公旣來戾而三老耆艾更相慶告昔公初

儀實監我州階是而往遂勤王室寅亮謨明辰階以平距三十年場來作屏人所天我且二之噢咻保障邦人攸宜願相約勅無拂公慮俾公陽休克熾而逾于是闔境聞風薰然交籲吏肅于局師和于屯政成事輯西驛騰報公曰官責舒矣姑逸無勞乃達觀署居寢眺城隅歸焉二樓聯冠州雉直良陬者曰彭祖占坎方者曰燕子問所容度凡百步而贏厥初僇功因樸成隘丹雘歲逝渙而不鮮公弭節久之心陋其制若曰此焉憚改是春秋無以衍吾屬而望吾氣焉指定于頤揆日丕作崇庠撤敵化爲高明收虞衡之羨材賈隸徒之羣力增增背觀弗勤弗亟迭奐竝輪與新偕來爾乃陽榮南舒負爲虛楹則席焉可裘丈陰軒北敞環爲飛檻則目焉可眺遠遡空蟠高快燭異儀由左而右厥制如一近之則泗汴二流素波相受趨洩激堆汨涵齋淪之奇呈露于廡下遠之則黃楚衆山翠嶺爭長舒霞逗景合沓奔騰之狀進列于階次臺風徐生棟雲自逝萬妍紛至一瞬可悉然而丞相落成于斯合飲于斯又有屬焉覽乎鮮原則農之竄勤是詢俯乎囂閑則工之苦良是察間旅簞豆則賓之威儀是式延玩草樹則土之腴瘠是啓至于良辰賞心發幽儲粹憑闕虛沈坐陶天倪可以適涼溫寧支體者公不專焉徐人是以知公之光輔二君昭明顯庸者推是心而已矣則又謀曰公之忠利仁愛及物也深一日趣舍人裝辦入毗天子則所聽所蒞尙將愛而歌之況麗譙改爲胡可弗紀明年幕府衰狀屬史官以索文謹按樓之賦名尙矣或以地或以事公卽而用之紀方言而著實也面勢所審衡從所底仍初者畧而不書惟是牆屋之完棟宇之壯

役靡淹時。令出子來。可以足言貽後者。則詩之革而飛者歟。禮之發而智者歟。

安州景福寺重修鐘樓記

聞夫世雄撫運。親列衆德之本。故員實之相形焉。能仁示滅。載昭夜景之鑒。故像未之教興焉。若乃大事之緣。由應感而出現。無邊之衆。習蒙薰而歸向。宅寶坊之勢勝。當導師之提唱。撤舊以更始。惟新而是圖。堂堂厥謀。鮮哉希矣。是郡也。踞申息之孔道。掩荆漢之奧殖。祀無淫昏之鬼。俗躋仁壽之域。漢網疏而不犯。堯民比而可封。欽奉珍祠。樂聞真諦。赤髭之侶。若稻竹而沓臻。堅材之施。譬輪輅而繼作。聽神由是來舍。紺宇于焉纒屬。卽景福寺。今爲郡之大招提也。面通莊之四達。壓城闔之一面。綿寶勢以盤踞。抗飛榮而靜深。煙霓上迴。龍天拱衛。且近西偏。以建靜塔。直東位以創層基。引千鈞之洪鐘。締百尋之彫閣。營繕雖廣。制度未隆。祥符末禩。洪霖繼臻。客土彌惡。屋瓦斯墜。譬誤昆陽之飛。隆棟旣顛。幾同大過之橈。子產懷將仆之懼。叔孫乖必葺之謀。誰其興之。則智元法師其人也。惟師雅志勇猛。深衷懇到。顧層構之將壞。懼清衆之闕警。聿興旦旦之誓。前諭舛舛之徒。大願躋格。至誠充洽。于是徧詣豪舉。旁詢耆德。周求畝首之富。下逮賈區之微。濬發一言。肯應千里。羣心率籲。譬取壤而不疵。喜捨相先。同在陰而皆和。涓日旣吉。選工旣良。壤材四湊。踰千章之多。密石載輶。盡一拳之介。郢斤投地。巧無蠅翼之傷。睢杵節音。雜若魚鱗之襲。晉臣之甃皆連。漢帝之陶在茲。因其曩基。煥以新構。鳩僝不已。妙勤咸盡。起敦牂之始歲。逮浹灘之

有秋功。惟告成事不愆。素爾其層檐錯繡。飛宇凌虛。逸倒景而上干。負陰虬而叢倚。行月納題而徐邁。流星奔闕而下視。鏤文木以裁檻。鏤褰金而綴鈴。朝暾麗乎髹彤。晴煙生乎縹碧。黑白仰止。厘三休而後至。殿閣交映。悅諸天而一同。輪焉奐焉。不可殫述者已。先是樓之改造也。遷鐘于別所。至是撫萬楹之高宇。陳兩變之茂器。峭格挺立。猛簾肅施。屬最之形。虛中而達逾速。春容之韻。居高而聽彌遠。叩大叩小。警晨暮于六時。不櫛不窳。助聲聞于三昧。固以輝映神壤。覺悟含靈。雜霜乳之相鳴。應洛銅而顯發。惡魔屏去。寂默而成道場。檀施雄成。音聲以爲佛事。由茲利益。其可誣哉。若夫靡初克終。詩之所貴也。樂成慮始。史之甚憚也。有若元師挺精一之志。當體大之業。指白水以示信。注黃金而不昏。百舍載馳。靡辭于重趼。一簣斯進。乃至成山。輓纖芥以相投。斬緹絲而靡績。可謂有初而慮始矣。日月之所遷引。毫釐之所哀合。斯干之百堵皆作。靈臺之不日告成。儼名輩而若翔。屹華鯨而斯叩。由積累以成大。俾勝利之現前。可謂克終而樂成矣。不如是者。棄井九仞。難免孟軻之譏。作舍三年。或抵漢人之誚。宜乎圖不朽之績。續無量之壽。宜六種以震動。爲三有之歸投。使夫登是樓者。知化城之所及。之非遙。衍法之輪轉。而不廢。聞是鐘者。知金之出礦。無復重爲聲之度垣。何可有礙。靈心發于欣助。諸方極其讚歎。故當刻鏤螭琰。焜耀雞園。珍地側金。配魯靈而長在。大音震物。與仙石以同漸。而予潤事靡工。落新無取。挾涸流而甫爾。恐綺語以自貽。非敢傳之方來。聊用謹其歲月云爾。

放生池記

古者土蟄發。敷人于是講罔罟。作蠱蕘。以供祀事。水蟲孕。澤虞于是禁鯢鮪。弋竿累。以廣羣育。中孚先豚魚之吉。風人美鰭鱉之多。太平之世。則取之有時。四靈爲畜。則用而不浚。鳥獸咸若。草木允殖。而萬物莫不衆矣。大江之南。水物惟錯。汙庫鍾美。雲雨興利。民就蒲贏。取蟲蜺。蜉蝣之捕日繁。鰕鮑之釣家至。禁令凌玩。川縕中貧。聖上初元之二年。詔立放生池于郡國。先是州城邪界。稻水彌望。鱗品聳聳。芼實紛駢。沆澣淡澹。齋淪深如。過風無損。卬浦茲大。挺叉沈餌。此焉攸處。由是守臣下教。林蛟謹職。盡籍其地。斥而營之。隅立桓柱。連亘鑿落。深極九仞。廣袤百弓。時梁罔施。數罟不入。乘秋水兩厓之至。殆鯢桓九名之淵。植物斯生。動物斯止。有頌其首。有幸其尾。圉圉亟縱。無子產校人之欺。激激出游。全莊生濠上之樂。若夫大道宰世。自見而推隱。至仁根心。因細而形大。愛乎萬物。乃譬于芻狗。憫其死地。何擇于牛羊。未有遠乎潛物而近遺吾民。重惜物生而輕用邦力。是薪輿不煩秋毫之察。折枝有異挾山之爲者矣。上聖之旨。豈不深哉。與其童山林。暴天物。魯侯泗淵之濫。斷罟致言。武皇滄海之徂。巨魚不出。叵同年而記已。僕親逢聖旦。復耳清詔。詎銜吾黨斐然之作。姑贊有虞好生之德云爾。時年月記。

衡山福嚴禪院二泉記

陳有大士曰慧思。得佛法要。始倡而南。乃舍峒嶺之墟。圖揆厥居。黑白其徒。褰裳景從。山阿土厚。汲以勤

苦師曰。吾當食此。神必我相。引仗刺地。靈液仰流。淳滴滲漉。更刺競注。憊焉熱惱。盪爲清涼。久之。大比丘衆陰計曰。有生濯漚。庸可以已。俄有猛獸。導師踰嶺。攢崖哮闕。檻泉隨之。由是華清交蟠。內周外給。禪和便安。道風流行。乃宇爲大蘭若。師已寂滅。其徒神之。因名二泉曰卓錫。曰虎跑。所以震顯冥符。收攝信源者。惟卓錫距堂下。深之十扶。其廣八之五。渟而不流。凡淪者烹者飪者茗者取焉。香以甘故也。虎跑直寺西。廣之五咫。其深四之三。浚而爲沱。剝木函溜。行二千尺。股分脈散。環像館。歷齋房。經廚軒。竝中園。繚浴廡。逗廝舍。然後淙而出之。注乎下田。凡湔者漱者浸者取焉。寒以潔故也。若乃溯陽弗泮。值陰弗涸。旱焉益深。潦焉益澄。十缶緇之不加餘。千壘挹之不加耗。滄淪澹淡。蓋源而不委者耶。嗚呼。斯人斯阜。寧獨煩流惡而止矣。亦將昭含天解。覺寤斯人歟。吾聞法有譬喻。請借泉爲喻。夫不鑿而浪似頓。澄焉自如似定。受垢弗辭似廣。兼利不言似慈。接物以廣。畜衆以定。息照以頓。卽心推而衍之。使自求之。彼挈然而來者。洒然而反。則師之志庶乎幾矣。今大長老省賢。後師四百載。又嗣其位。荷擔惠命。光照前人。周案顯跡。欽如神對。巧文紀實。與此泉偕。余不敏。姑摺前載。以竄今事。款之茲山。時慶歷紀元之初年月日記。

復州乾明禪院記

或稱。離一切相。是之謂法。依十方佛。是之謂宗。予曰。不也。夫舍妄求真。必有二體。擯外修內。則立中間。是擾擾之羣生。執種種之差別。棄大海之水。誤認一漚。舍如意之珠。更求至寶。乃有三僧祇之辛苦。五濁惡

之流浪。無縛求解。揔目取華。由是能仁憫憐。正眼提唱。法無可得。而名說法。言雖終日。而未嘗言。不自階升。徑躋補處。自迦文滅度。後二十八祖。而茲土傳教。達磨滅度。後二百餘年。而信衣不傳。雲雷普聞。子孫繁盛。法集禪叢之窟。徧天下矣。復州者。撻江漢之北望。古曰景陵郡。乾明院者。直譙門之東趣。唐爲開元寺。會昌之難。翦焉荆棘。劫火沈燼。山靈見鞭。像法中興。改題院額。祀不失物。益作四事之嚴。天定勝人。復會六合之衆。然或外請尊者。以號住持。或卽付上首。以爲傳襲。教失厥序。人有其私。金注益殫。但取小乘之愛。井飲相捧。寢墮大事之緣。運之少還。物乃傾否。天禧中。比部員外郎邢若思來領州事。因目勝地。久爲人廢。乃率郡之大檀越。及比丘衆。奉公檄詣鄂州靈竹院。請今長老契穩。以尸之。惟師逗西竺之上機。紹法眼之昆裔。純熟衆德。摧伏羣魔。應以有情。旣詣寶所。至上之日。黑白和會。露味灌洒。象王蹴踏。曾未朞月。學徒至者。蓋百餘人。猶草之得陽春。如子之和鳴鶴。修復頽範。太興層構。乃有五臺僧澄。岸造僧堂。攝州司馬李遠。向禮建三門行廡。長沙僧智亮。作浴室。州校陳釗。跨波爲橋亭。不出十年。遂臻考室。或施瓔絡。或散香花。園公布金。海人上氎。什器帷帳。罔不周給。千楹攢注。類天宮之化成。百寶莊嚴。疑地神之通現。師之功德。可思議之哉。夫有爲之謂緣。利他之謂廣。無來去之謂妙。卽心佛之謂頓。圓裹四者。而不見其用。之謂第一義。彼上人者。其庶幾焉。宜其爲巨海之舟航。大方之牆塹者已。師以僕嘗任州幕。具知勝因。列狀載勒。刻識爲託。且欲令後付囑者。不私于己。其以吾爲茲院之初祖也。矧國有著令。來者得不

信受奉行之時年月日記。

西齋休偃記

夫坐藪澤樂閒處。遁世者能之。近湫隘。不易宅。有德者能之。若吾人者。漫漶塵容。嬰絡世網。進無腹背之用。退有輻鎖之名。鑿繁喪真。注重增拙。非得蕭散之地。休偃之樂。則何以胖勤體。旺勞神。徜徉日出。專氣閭實。入寥天之域哉。自予游都城。官太學。官最閒。外僦私舍。濱蔡漕。地尤岑寂。居有西齋。因得爲畸人休景之地。先是。軒豁其南。以爲堂庭。前人多以竹樹雜藝左右。復有二夾廡。用貯陳書十許篋。每令辰歸沐。輒直番休。脫幘褫巾。箕坐自縱。或冷風暫至。則竅者穴者。槁者條者。蕭然竝籟。翔嗽旣華。則樛者挺者。皆者缺者。雜然布陰。于是內捷暫祛。外喧不入。呻黃卷。據藜牀。兀乎標枝。澹乎深淵。目睇飛鴻。心遡歸雲。遽適適。不知周粟之薄。顏閭之陋也。昔人以名教中自有樂地。寧欺我哉。況今叢雲在辰。羣雋如植。巧者進取。拙者低伏。理所宜也。予故拙矣。安不爾思。就令勉強倜儻之姿。希馳驚之轍。而車馬官位不能動人。色蔽舌噙。趨步踽踽。不過飢饉門外。得家丞一謝耳。又何能請問關說。及天下事哉。昔仁者攸居。著里端而爲美。愚公所處。并谷名而遂移。予上方旣慙。下比何愧。尙恨非吾土者。不爾當以樸拙名齋。

君山養猿記

猿與沐猴。類同而種別。沐猴躁動。好騰倚挽裂。詭故百情。韓生曰。沐猴而冠。故教猱升木。詩人著焉。猿性